

IRATSIQUENAME MARANQUE

Meeca noquenquitsatacotajea, peerani iratsiquename maranque anta nonampiqui.

Ari nojajeitaque anta Quempiriqui, icamojeiti. Impoiiji nojivatanaque naroqueti areetacaro Quempiri. Notsipatanacari pavachori. Ari icantana pavachori:

-Notiomi, ari aquenanaqueri ara ashiteajatanaquearo antaquea ayaajeitapaaqueri cationcoji. Ari nocantiri:

-Jee, aitaque aquenanaqueri.

Impoiiji nojivatanaque, ari nocantanaca tic, tic, tic. Ari nocatiapaaca, te noneapeeriji maranque yora coshipirínque.

Impoiiji nopitsocanaca, namenantacariri iriotaque yoca quirotainchari ishaaviji quipatsiqui. Ari nocajemanaque, nocantiri pavachori:

-¡Eee! Maranquenica yocavee, yatsicavetaquena. Aitaque nosapocanaque, yoijaveitanaquena aitaque noshianaca.

Ari icantana pavachori:

-¿Jaocame inaqueri aca?

Nocantiri:

-Jeri yora noshicanainchari, sorororo.

Ari ipocajeitapaaque, ineajeitapaaqueri, ipasatapaaqueri, tac, tac, tac.

YATSIQUIRI SHIRAMPARI MARANQUE

Meeca noquenquitsatacoteri aparoni shirampari yatsiquiri maranque. Ijaveta iquenaveeti anta inchatoshiqui. Impoiji ineapaaqueri maranque, icanti:

-Etininiteemi.

Jaa, irinti maranque. Ari meeca ipasacaveta-caro omoro, ora quipatsi, iquematiiri yatsicaqueri iracoqui, shepi. Jeri meeca yoca ashaninca, yatsicaqueri maranque.

Impoiji meeca yatsicaqueri icajemanaque:

-¡Eee! Yatsicaitaquaenaaquea maranque.

Ijatanaji anta ivancoqui, ineetavajiri, isoquijapaaji soquire. Impoiji icantapairo ijina:

-Yatsicaquena nainti maranque.

Impoiji ijina ocantiri:

-¿Paitaquea pantiri yatsicantaquempiri?

Icantiro:

-Tecatsi. Namenavetaro imoro etini. Nojita-paaqueri irio etini iqueati. Irintiquea maranque.

Impoiji meeca yavisacotaji. Ocarati mava quitaiteri. Icant:

-¡Ariove! nocamashiveitaca, meecaquea eiro nojatajitsi noquenayetaje. Oshequi maranque.

NOJATI PASHINIQUI NAMPITSI

Meeca noquenquitsatacotea nojati pashiniqui nampitsi.

Ari nojati pashiniqui nampitsi, naajeitanaqueri maaroni jananequi. Iro nojatantacari icajemacaanteetiri yora alumno irijoecatea anta Potsoteniqui. Irio pacaantirori oficio yora profesor pajitachari Custodio. Ari nojivatanaque nainti icantana yora Directortatsiri anta San Jeronimoqui ipajita Leocadio Almonacid G. Icanti:

-Meeca José pijivatacayeri jananequi anta Potsoteniqui areetaca oficio irijate jananequipee irijoecatempa. Ari nimpoitanaje narori namenanaquerita notomi yojoquiitaca.

Ari iroosati nojatantaca **nosoguijanaque** icarataque catsirincaiteri 7:30 am. Yaanontajeitanaca jananequipee iroyaari. Nocantanaca tic, tic, tic. Iroosati nareetantaca opajita nampitsi Alto Saniveni, novaanaca irosati nareetantacaro pashini nampitsiqui opajita Capireni. Novaanaca iroosati nareetantacaro nijateni, ari noajeitapaaca maaroni yora jananequipee. Ari isampitana jananequi icanti:

-¿Tequerampa areeteaji profesor?

Impoiiji meeca opariaque incani, noshiyavetaca
aca pancotsiqui noneaapatiro cajataque maaroni
novashicaro, aisati nomantare cajataque, tecatsi
noquene catsini. Nocajajeitaque maaroni. Ari
nocantiri pashini jananequi:

—Pitotero irishi quitsani. Tsame atashite-
rota.

Yaitaro itotaquero itashitaquero tashi,
noajeitacaro osaite. Nosavicajeitaque cajataquena.
Irosati ocarajencaanaji incani, ari nomaanaque
tore. Iroosati ineantaja teapa. Oquitaitetanaque
incotacaantaqueri quitsani noajeitanacari
maaroni. Irosati navisantana pashiniqui ashanin-
ca. Ari nosavicapai aisati. Nosampitiri
ashaninca:

—¿Tequerampa nareetearoji ora Potsotenini?
Yacanaquena iriori icanti:

—Tequera, ari pavisanaje pashini ashaninca.
Icarate catsirincateri tampatica, ari pareetea.

—Ja, queario icantaqueri, tampatica nareetaca
anta Potsoteniqui.

Noneapaatiri yora profesor, yovajeitaita.
Ari novetsatapaacari aisati yora jananequi maaroni
yovetsajeitapaacari. Aisati iriori jananequi
timatsiri Potsoteniqui yovetsatavaquena. Aisati
ipavaquena yora profesor caniri.

Yora jananequipee itsoncajeitaqueri yatsica-
queri pijiri iitoqui. Irosati ipocantaja, nainti
nosavicanaji. Apitero yora Almonacid jeri pashini
ashaninca ipajita Andrés. Irosati icantantana
profesor:

—Tsame ajataite otsitijaqui Potsotenini
aneaiteriri yora Roberto Champiqui, avisanaque
aisati. Irosati ajatantea anta Tsiquireniqui,
avisanaquero aisati. Irosati ajatantaitea anta
Paquitsapancoqui.

Irosati icantantanaca Leocadio Almonacid:

—Ja, tsamequeti nocol noneero jaoca
ocantari Paquitsapanconi.

Irosati nojatantaca, ari nomaapaaque
otsitijaqui Potsotenini. Anta ivancoqui Roberto
Champiqui. Oshequi aisati pijiri ari yatsicava-
quenari narori aisati Almonacid, aisati Custodio.

Irintiquea pashini noshaninca ijataque irinti
itsiyoyeti samani irosati ineantacari iveto.
Irosati itoncantacari. Ari ipocapaaaji icantapaa-
que:

—Maaguempi ara, camaque iveto. Tsame
atotaiterí. Tsame ashincoterita ayaari.

Irosati nojajeitantaca anta otsaapijaqui
tamponi noneapaatiri inareaca iveto. Irosati
nototantacari shei, shei, shei. Imencotashita-
queri noshincotanteariri. Noshincotaqueri